

新元史

第四五册

列傳第七十一

新元史卷之一百七十四

賜進士出身日講起居注官翰林院侍讀國史館纂修膠州柯劭忞撰

李秉彝

覃澄

謝仲溫

姜彧

高源

韓政

馮帖

胡祇遜

王綱

思聰

曹世貴

詹士龍

高良弼

白棟

孫澤

良楨

趙宏偉

璉琬

李秉彝字仲常通州潞縣人幼沈毅見人倨坐輒色變由是眾異焉七歲讀書日千言十歲能習古篆隸年二十餘謁行省粘合重山辟爲掾未幾遷都事說重山曰金亡人材無所附麗天下初定宜拔其尤者爲朝廷用重山韙其言首聘王磐授子弟經於是士大夫相繼登重山之門參議王文統投書重山請立河南行省曰距河隄南北之勢用財結上下之交可以得志秉彝斥爲邪說願勿聽後文統果敗遷員外郎從世祖伐宋渡江將士爭掠金帛秉彝獨載書萬卷以還中統三年遷中興等處行省郎中時兵亂初平民艱食秉彝奉命賑恤

全活無數至元二年徙四川民苦竹稅奏罷之遷大中
大夫佩金符爲彰德宣課運使課最擢尙書戶部侍郎
八年秋中原蝗銜命往捕有不盡心者聽以軍法從事
秉彝訖事未嘗操切明年京師饑朝廷用秉彝言發廩
賑之又明年魚兒泊饑亦奉命賑其民出爲都提舉漕
運使中臺察廉能奏授陝西四川道按察副使巡行灌
州州故有李公堰當三江口遇水漂悍輒壞歲調民夫
修之秉彝以爲築之堅可已患父老謂壅遏漲勢恐爲
成都害秉彝令投石水中問曰水從石上過耶石下耶
皆曰從石上秉彝曰水從石上過甯有壅遏之患乎督

有司三月堰成自是大水至冒堰上行旱則瀦以溉田費省而利興十四年除江州路總管屬邑有剽掠者有司以叛告官軍旣至俘良民甚衆秉彝要於路詰無辜者千餘人悉縱之黃州叛九江戍卒僅五百人呂師龍新降爲招討使擁精騎數千檄使捍禦不聽秉彝夜登庾樓遙望小舟順流下邏獲七人自黃州來持叛書期師龍以五月十六日爲內應秉彝卽偕其計議官陳文彬見師龍諭以利害師龍自誓不知秉彝曰審爾請分兵守城師龍從命九江遂安堵其兄師夔自江西奉黃金二百兩白金二千兩奴婢十人爲謝卻不受義門陳

氏苦縣吏貪酷戕吏卒秉彝曰非叛也遣人招撫之闔族千餘口皆得免遷湖州總管踰年又徙常德官種柑橘五百株以代民貢歲歉黜同僚議不俟命開倉救饑者民立碑頌之十九年擢通議大夫兩浙轉運使轉正義大夫除工部尙書復出爲兩浙轉運使兼杭州諸色課程及市舶前同知納速剌丁倚權臣勢奪秉彝職候理算欲因以誣秉彝卒不得毫髮私羣小讐服歸至鎮江病卒年六十五

覃澄字彥清興德懷來人父資榮仕金爲縣令率衆款附以金符授元帥左都監令如故改賜金虎符升行元

帥府事復以其弟資用代充元帥左監軍資用卒以澄代之年十八太宗八年州縣置達魯花赤以監守令不習國語者則受命於譯人澄慮見欺日與習國語者游歲餘悉通曉與達魯花赤議事應答無滯人以爲不學而能燕京置斷事官建行臺府檄澄往受事澄請省工料費凡橫取於民皆減之文谷水分漑交城爲平州知州所遏交城人訟之終不直澄爭於行省知州噤屈水利大興俄入覲因耶律楚材面陳乙未料民率以無產僑民入籍及賦下悉逃避責徵實存官稱貸納之困不能償以子爲母息日增謂之特生利帝憫之勅免其逋

賦公私之負三年勿徵子母相當止其息民困大蘇王
子復料民澄削其逃戶不入籍民尤頌之世祖平大理
還澄上謁帝喜其容止留居藩府以其弟山阜代爲交
城令憲宗疑世祖有貳心遣劉太平等置計局於京兆
條百四十有二事多方鉤覆且興大獄世祖遣澄與庫
濟勒見太平等通款曲世祖亦入朝事始解世祖南征
使澄專治懷孟歲旱鑿唐溫渠引沁水灌河內諸縣中
統元年詔獎其練習政事授懷孟路總管賜金符又換
虎符至元二年省懷孟衛輝兩路入彰德改授同知總
管府事丁憂起復遷少中大夫平涼路總管七年散階

例降二等改奉議大夫司農少卿尋遷京兆路總管兼府尹又改陝西四川道提刑按察使詔禁有妻者娶妾澄建言不孝有三無後爲大請四十無子者聽其娶妾中書黜之十年宋將胥萬壽入寇大敗僉省嚴忠範於成都入其郛世祖械忠範至都遣澄代之澄練兵儲餉宋人知其有備不敢犯十一年西南夷羅羅斯內附以澄爲副都元帥同知宣慰司事澄不習水土竟以疾卒年五十八初游顯爲大名路宣撫使爲諸路總管求金符奏已上澄白於中書辭不受曰上不識覃澄耶乃爲顯所舉省臣爲去其名其剛介如此劉秉忠常謂天下

長吏如邢之張耕懷孟之覃澄何憂不治許衡亦重其爲人稱爲當時循吏焉子克修陝西漢中路提刑按察使亦有能名卒贈禮部尙書追封宏農郡侯諡文憲

謝仲溫字君玉豐州豐縣人父睦歡以貲雄鄉里大兵南下轉客兀刺城太祖攻西夏過其城睦歡與其帥迎降從攻西京睦歡力戰先登連中三矢仆城下太宗見而憐之命軍校拔矢縛牛刳其腸納睦歡於牛腹中良久乃甦後官至太原路金銀鐵冶達魯花赤仲溫通書史初見世祖於野狐嶺命備宿衛凡行幸必在左右及城上都以仲溫爲工部提領督其役帝曰汝但執梃雖

百千人甯不懼汝耶憲宗九年大軍圍鄂軍餉缺仲溫教兵士鬻魚以充食帝喜謂侍臣曰朕思不及此飲以駝乳一夕帝聞敵軍謹譟命警備仲溫奉繩床帝憑其肩以行至旦不寐申統元年擢平陽太原兩路宣撫使二年改西京至元九年遷順德路總管時方用兵江淮有寡婦鬻子以償轉輸之直仲溫出俸金贖還之十六年遷湖南宣慰使二十二年改淮東歲旱仲溫導白水塘溉民田公私賴之三十年春入見帝曰汝非謝仲溫乎朕謂汝死矣從容語及攻鄂時事帝喜甚諭曰汝將復官乎朕爲汝擇之對曰臣老矣一子早亡惟有孫孛

完幸陛下憐之卽日命備宿衛大德六年卒年八十子
蘭江州達魯花赤先卒蘭子孛完冀甯等路管民提舉
司達魯花赤

姜彧字文卿萊州萊陽人父椿與張榮有舊避楊安兒
之亂依榮於濟南榮愛彧才辟爲掾遷左右司都事進
郎中斷事官遣彧詣闕奏割陵州五城屬於榮以彧爲
參議官中統元年彧從榮孫宏入朝密奏李璫反狀已
露宜先其未發制之不報明年璫果反襲陷濟南彧從
宏討璫見賊勢已蹙城旦夕且下乃夜謁諸王哈必赤
請諭諸將勿入城縱兵哈必赤從之明日賊開門出降

哈必赤下令將士敢入城者以軍法論城中安堵如故以或知濱州時行營多占民田爲牧地縱牛馬壞稼或請分畫牧地疆界捕壞稼者置之法又課民種桑人名爲太守桑歌曰田野桑麻一倍增昔無粗麻今續繒太守之賢如景星後遷東平府判官至元五年召拜治書侍御史七年出爲河北河南道提刑按察使賜金虎符改信州路總管累遷陝西漢中河東山西提刑按察使拜行臺御史中丞後謝病歸尋起爲燕南河北道提刑按察使以老病致仕三十年卒年七十六子四人迪吉從吉呂璞

高源字仲淵晉州饒陽人父汝霖真定廉訪司照磨使
東平遇盜死源幼力學事母孝補縣吏中統初擢衛輝
路知事遷齊河縣尹有遺愛去官十年民猶立碑頌之
再遷行臺都事僉江南浙西道提刑按察司事劾常州
路達魯花赤馬恕奪民田及他不法事恕懼走賂權臣
阿合馬以他事誣源旣繫獄一日忽釋之莫知所由先
時源鄰里多阿合馬姻戚素知源事母孝至是聞源坐
非辜悉詣阿合馬曰源孝子也非但我知之天必知之
若妄殺源悖天不祥阿合馬感悟得不死尋除河間等
路都轉運副使撫治有條竈戶逃者皆復業常賦外羨

餘至十萬緡正元二十四年改江東道勸農營田使二十八年遷都水監開通惠河由文明門東七十里與會通河接置閘七橋十二人蒙其利授同知湖南道宣慰司事卒年七十七

韓政字君用益都人父松之從金四駙馬伐宋戍山陽戰歿政幼孤習醫術以自給後從諸王塔察兒鎮遼東塔察兒白其計畫於世祖帝奇之至元十三年相威爲征西都元帥討西番授政嘉議大夫漢軍元帥監軍佩金虎符軍中大驚曰監軍非國姓不可得裕宗在東宮亦疑之政入辭命挽强弓彀而復引者三裕宗歎曰皇

帝善任使若是賜錦衣一襲以行政西逾大磧斬馘甚多軍還授前衛親軍副都元帥指揮使兼領左右衛屯田軍馬奏以屯田統屬於衛而治其無良者從之十九年加正議大夫充樞密院判官俄拜治書侍御史劾中書右丞盧世榮牟利卒正其罪二十三年出爲淮東道提刑按察使善決疑獄爲吏民所稱卒年六十六贈嘉議大夫尙書上輕車都尉南陽郡侯諡威敏子拱增城縣尹振昌國州知州極御藥副使

馮岵字壽卿中山人祖父壁金同知集慶軍節度使父渭右三部郎中初壁從金宣宗南渡與渭母相失渭徒

行千里求之哀動行路時稱爲馮孝子帖聰悟好學辟中書省掾故事諸曹皆出爲總管判官帖以忤執政獨抑爲真定轉運經歷遷無極令考最換曲周令大軍圍襄陽籍河北民兵濟之帖視丁地入中甲者戶抽一人賄託不行富室計無所施民翕然頌之宋平擢奉議大夫僉山南湖北道提刑按察司事改嶺北湖南道又改河北河南道劾罷貪吏三百餘人籍沒賕賂至三千錠怨家訟帖不法十餘事詔御史按之皆不實抵誣者罪擢帖朝請大夫江西湖北道提刑按察副使尋告歸起爲山北遼東道提刑按察副使以疾辭再換山南江北